

攻
媿
集

攻媿集卷四十五

宋

樓

鑰

撰

內制

右丞相趙汝愚加食邑實封制

門下朕祗膺丕緒肇祀合宮賴天地之靈儼百神而顧
享嚴祖宗之配綿萬世以承休惟時大臣贊我締禮肆
頒祭澤敷告朝倫具官某寬博而崇深裕和而肅括學
造聖賢之蘊才兼文武之優有經濟四海之志而行之
以忠有酬酢萬變之智而決之以果擢由樞筦進秉國

鈞是爲社稷之元勲非止衣冠之盛事處心無競休休
多容物之仁守道不阿蹇蹇盡匪躬之節予所毗倚國
其庶幾頃卜仲辛恭修大饗上稽皇祐之故典近遵慈
極之宏謨致精三日之齋虔奉九筵之制惟辟公之顯
相厥有賢勞顧熙事之備成敢云專鄉增多采邑併衍
真畬以隆巖石之瞻以壯維城之勢於戲載貂蟬而展
采固宰路之所同被裘繡以侍祠實宗盟之未有惟親
賢之並用于邦國以增光其服渙恩益圖治績

賜告口宜有敕卿爲時上相贊我盛儀是宜與邑之

多用見疇庸之渥其祇成命毋事謙辭

士歆加食邑實封制

門下朕嚴九筵之禮是曰肇禋逆三神之釐若蒙昭答
餽惠所暨臣鄰斯均矧惟屬籍之尊可後恩光之渥集
廷紳而誕告示詔綍之匪私具官某德性寬洪風猷端
粹重珪疊組生長富貴之中蕩節駢旄雍容閒燕之久
惟夙夜之匪懈仰春秋之益高實長周家之宗盟是爲
劉氏之祭酒茲崇宗祀預贊上儀冠班列于三孤聳儀
刑于九族乃加并賦仍侈圭腴以表耆英以隆孝治於

戲祭有十倫之義莫如同姓之先備者百順之名益介遐齡之永願如壽俊奚假訓辭

賜告口宜有敕卿位冠孤卿望高宗老旣奉合宮之祀宜加采邑之封雖曰彝章是爲新渥

郭師禹加食邑實封制

門下朕祇事總章荷神祇之來格廣施惠術普中外以惟均顧予元舅之親嘗預羣工之相肆加異數明告周行具官某迪德忱恂飭躬謙靖祖后實爲同氣壽皇尤篤優恩淑旂綏章蚤授齋壇之鉞篆車希冕近升棘位

之班疏三吳公社之封廩萬壽祠庭之祿能屏膏粱之
習自忘圭組之崇比卜季秋親祠重屋茂對三神之祉
宜先四姓之賢用衍爰田載加真食於戲兢兢業業以
事上帝朕敢懷專鄉之私洞洞屬屬而存小心爾尚介
方來之寵益昭吉履永保修名

賜告口宣有敕禮畢九筵恩均百辟賜予伯舅之胙
均茲宣室之釐與邑旣多頒綸可後

周必大加食邑實封制

門下朕嗣守邦圖肇修宗祀父天母地祭旣重于合祚

尊祖敬宗禮尤嚴于並祐予一人越紼以行事爾多士
奉璋而侍祠眷舊弼以興思顧慶條之可後誕揚渙號
敷告旰廷具官某簡重而閎深直方而膚敏典誥上規
于姚姒詞章遠軋于漢周弼亮兩朝未究經綸之蘊鎮
安四海有懷康濟之功偃藩南國之雄均逸東山之勝
比以霈恩之渥升之亞傅之崇注想不忘乞言方切屬
伸大報爰啓合宮載謀載惟聖父嘗頒于先甲我將我
享季秋乃卜于仲辛熙事旣成蕃釐來介申衍多田之
賦仍加眞食之封於戲明堂王者之堂方荷神休之答

二老天下之老宜先祭澤之施尚迪遠猷永綏殊寵

賜告口宣有敕卿嘗位冢司均休真館屬總章之竣
事賦多邑以示恩其卽欽承以祇眷渥

師夔加食邑實封制

門下朕寅紹丕圖虔修大饗親惟伯父既有助于多儀
神介蕃釐詎敢云夫專鄉亶敷命綍用告昕廷具官某
履行粹和稟質端靖生長神明之胄源流詩禮之傳出
分顧憂見民庸之甚茂入趨班綴奉朝謁以尤恭建六
纛以承家視三孤而命秩屬講肇禋之禮適當越紼之

行攝事太宮降登有度陪祠重屋顯相無違庸推祭澤之優可後宗盟之懿爰加并賦併衍畚租茲謂恩裒式昭名數於戲奉犧牲粢盛而告聿嚴布政之宮拓山川土田之封益示展親之義其祇異渥以對靈娛

賜告口宣

吳瓌吳璠同

有敕禮成重屋賚及萬方宜首及

于懿親用申加于多邑載頒明命其服殊恩

吳瓌加食邑實封制

門下朕穆卜季秋躬修大祀靈祇授職幸熙事之備成多士在廷賴懿親之顯相宜頒惠術敷告羣工具官某

謹畏自將純和無玷聯四姓小侯之貴承三朝外戚之
恩入侍中宸屬橐鞶而甚肅進班上閤飭冠佩以尤嚴
頃建齋壇退安琳宇旋視孤卿之秩併開公社之封建
藏禮于九筵實均釐于萬國乃增采邑仍衍圭腴以彰
寵數之優以表肅雝之助於戲蒐上儀于陽館豈惟黍
稷之馨錫蕃祉于后家可後賑膳之賜尙綏吉履以服
彝章

吳琚加食邑實封制

門下合宮肇祀實祇奉于慈謨宣室受釐爰大頒于霈

澤惟時懿戚夙著賢稱庸舉徽章式孚渙號具官某美
由世濟才應時須登簪筆持橐之聯惟知避寵更握節
擁麾之選不專爲恩比崇建于齋旄旋寢加于孤棘逮
茲大報贊我上儀禮旣備于八階昨惟優于四姓俾增
多賦仍衍真腴於戲文德以講明堂幸神祇之顧饗賀
慶以親異姓宜福履之均霑雖曰邦彝尙承惠渥

郭杲加食邑實封制

門下朕頃用盛秋虔修宗祀奉犧牲以薦備陳重屋之
儀賴爪牙之良肅領千廬之衛旣云竣事可後均釐我

有明綸告于列位具官某生資沈毅世濟忠勤氣稟山
西期遠追于起翦書傳圯上自有合于孫吳久專將閫
之雄入侍殿巖之邃屬祇孝饗務罄齋誠奉璋惟多士
之賢執戟有元戎之重肆疇采邑仍啓侯封以介靈休
以彰異渥於戲茅簷蒿柱朕方躬大禮之嚴玉節琚戈
爾尚體中權之寄益思忠報以答殊知

賜告口宣

蕭鵬
巴同

有敕禮巖重屋澤及羣工錫多邑于

巖除啓新封于侯甸

蕭改眷我勁
臣疇茲多賦

其祇明命益勵忠

猷

項效集
卷三
蕭鷗巴加食邑實封制

門下奠圭瓚以薦誠既虔修于宗祀執豆籩而在列宜
咸被于靈娛眷我虎臣董茲羽衛厥有渙恩之錫式彰
顯相之勞具官某智略雄深性資沈鷺望雲就日夙肩
面內之誠建旄設旄馴致總戎之拜奉真祠而均佚視
左棘以疏榮乃因霈澤之行增畀爰田之賦申加真食
用侈神休於戲承異眷于三朝蓋屢覲彌文之盛敷大
賚于四海顧可無寵數之優益綏令圖以保終吉

郭師禹特授少師封永寧郡王加食邑實封制

門下朕纂上皇之丕緒承列祖之通喪復土告功既克
襄于大事提綱置使實有賴于懿親爰播明綸肆加殊
寵具官某小心自牧吉德著聞蚤席慶于椒闈寔升華
于棘位恂恂家法靡矜金穴之奢侃侃朝班久遂琳宮
之適茲卜會稽之麓往營永阜之陵靈駕徐驅飭厥儀
而肅靖重臣主辦訖闕寢之固安粵惟元舅之崇可忘
醴賞之報繁勞之稱匪朕敢私袞服命圭顯冠孤卿之
秩金印盩綬進封異姓之王仍旆鉞于東秦徹土疆于
南晉申陪井賦併侈轅疇以昭四姓之華以篤三朝之

功如集 卷三 十一 穆 晉 校
眷於戲節侯仕漢得謹畏謙恭之聲尙父在唐有富貴
繁衍之盛豈其苗裔見此親賢其踵前人之休以爲密
戚之勸

賜告口宣有敕阜陵復土元舅策勲旣升冠于孤卿
仍疏封于王爵其祇渙渥毋事謙辭

皇伯祖太師嗣秀王伯圭特授兼中書令加食邑
實封制

門下朕祇紹炎圖遙繩祖武追仰抱孫之愛謹奉敢塗
實繫同氣之賢式專使領克襄大事悉按舊章昭示殊

褒用孚羣聽具官某聯休皇極正位泰階直大以方厚
載體坤爻之二爵齒與德達尊全天下之三惟我孝宗
最崇秀邸眷乃象賢之懿襲茲開國之封敬其所尊愛
其所親今當推于宗老反也如疑往也如慕況密護于
厥儀每入臨于朝晡曾不避于塗潦能以從心之歲躬
爲復土之勤有司莫敢不哀行路爲之感動語必流涕
誓報平生之恩賞不踰時肆舉非常之典是兼紫微令
之重以爲大父行之華仍衍爰田併豐眞食匪以爵而
馭貴恨無官以酬公於戲隆專席之榮盡用祥符之故

實第中書之攷會參尚父之勲名以增師尹之嚴以侈
邦家之盛益綏壽嘏庸對寵光

賜告口宣有敕卿貴隆人爵尊襲王封親臨永阜之
藏寵冠中臺之列是爲殊渥尙體眷懷

右丞相趙汝愚特授銀青光祿大夫加食邑實封
制

門下聖人因親教愛蓋本于躬行大臣以道事君莫先
于協贊朕方遵皇祖之訓形四方之風眷我宗英相予
孝理惟忠勞之備著繫命數之宜加爰集具僚載申褒